

嘉業堂
金石叢書

海東金石苑

第六册

K8:
9.



海東金石苑補遺卷三

吳興 劉 承幹 校錄

金誠墓誌

高一尺四寸廣二尺一寸三分
二十七行行二十四字正書

公諱誠字德元姓京兆金氏其先道康郡人贈校太子
大師錫符之子檢校太子大傅殿邦之孫尚書右僕射
濮陽吳題之外孫也公天資粹美年甫弱冠以明經擢
第授秘書校書郎同正倅德州防禦使三年以簡惠稱
及裕陵即位之三年丁亥女真警邊上命公之母
弟中書侍郎平章事吳延寵爲兵馬元帥公爲幕下士

有不來之死志及寇退以功調典厩令遷大府注簿
奉朝用人凡官至七品者皆遣守知州以故公亦出刺
寶城郡秩滿爲將作注簿以違忤貴勢又謫守順州尋
入爲大府注簿歷尚書都事遷監察御史爲西京分臺
一周歲籥而櫛垢爬痒民獲蘇醒其後以刑部員外郎
左遷爲東京副留守時東京多厄留守輒死公以忠義
爲神明所相善政大成進秩爲秘書丞及至 輦下改
授兵部郎中三司判官口遷衛尉少卿知刑部事改爲
秘書少監御書檢討官知戶部事公於經術之外亦以
吏幹爲己任爲 仁廟所深知故自卿寺以至爲朝議

大夫戶部尙書凡數年間屢被差出或以按察副使澄
清東南列郡或以兵馬副使折衝千里或以察訪使激
濁揚清所臨皆有能聲公爲人謹飭畏慎始自署令以
至懸車歷二十三官處事無毫釐過差又不接踵於權
貴之門以取笑於冰山此豈明拓能盡保身之道乎大
金皇統七年丁卯十口月八日卒年七十二其年十一
月晦焚瘞于城南至翌年秋七月二十六日葬于松林
縣馬山西麓妻盧氏尙乘奉御盧格之女也生二男長
伸沆文林郎衛尉注簿同正娶戶部郎中清河崔時亢
之女生一男一女男襲祖門蔭繼丁庄為後其季大齡

承祖父業擢明經第為國學學諭國子祭酒權適每稱其為人大齡與禮賓丞同正梁積中友善一日將家錄乞銘于積中積中不拒其請乃為銘曰

以經術進身而以吏幹聞宜乎其得志於 明君

元沆墓誌

高二尺四寸八分廣一尺五寸五分二十行行三十二字正書

高麗國故朝請大夫檢校太子大保國子祭酒

御書檢討官 賜紫□□□致仕元公墓誌銘

權知國子博士朴 永文 述

公諱沆字天啓北原人也考諱冠追封太子詹事妣文

氏長淵郡大夫人公生於大康六年庚申至 睿宗即位二年丙戌擢進士第 上好文招禮儒士公以名學與蒙 恩澤乾統末調陝州通判秩滿權知直史館遷御書留院官歷七八品爲猛州副使 仁宗即位八年已酉以少府注簿兼樞密院堂後官曹務公平人人無訟世以此多之十年辛亥拜試閣門祇候十一年壬子以殿中內給事爲西京留守判官是年春 上西幸改授試尙衣奉御西人妙清趙匡等疾公剛正讒之移南京少尹未幾 上知之復舊職十三年甲寅隨 駕赴闕出爲安邊都護府副使解印由尙舍奉御轉兵部員

外郎改刑部員外郎夙夜在公 上稱之俄遷刑部郎
中二十三年甲子除司宰少卿是時 仁宗享國有年
往往 聞公忠正無它擢爲試工部侍郎有司以恒例
沮之未行改授試將作監 今上即位元年丙寅拜試
禮部侍郎除試兼御書檢討官仍授朝散大夫國子祭
酒餘如故三年戊辰加授朝請大夫十一月累表乞骸
以正三品祿歸老丐家翌年己巳八月二十一日庚午
卒于龍興寺德賢院九月甲申葬于偉德山之西麓時
大金皇統九年也公爲人寬大長者揚歷中外所臨有
聲晚讀佛氏書清淨爲務夫人宋氏一男二女昏嫁皆

畢男燾以好學尤工書著名于世年甫二十二歲登第
歷靈州通判噫公之歿也行狀如是可不銘哉銘曰
公之平昔 堂堂威儀 直道而行 爲上所
知 歷事三王 終始無虧 公雖歿世 厥子肯基
惟其有之 是以似之

崔湧妻金氏墓銘

高二尺五寸一分廣一尺六寸
七分十八行行二十五字正書

江陵郡大夫人金氏墓銘

夫人金氏其先海東溟州人新羅王孫也曾祖諱徵祐
祖諱陽皆出入清顯位至僕射考諱上琦在 文宗時

特以忠鯁見稱於朝位至門下侍郎平章事判尙書禮
兵部事監修國史上柱國謚文貞公母漢南郡大夫人
崔氏水州人夫人年二十有四歲適清口郡崔氏諱湧
卒贈守司空左僕射叅知政事判工部事口口郎守大
師中書令文獻公冲之曾孫中書令文和公惟善之孫
平章事良平公思齊之第三子生八男五女長女適少
卿黃公偉長男弘護寺住持三重俊流二男衛尉卿知
工部閣門事允俶三男刑部侍郎知御史臺事實文閣
直學士知制誥允儀三女長信宮主即睿宗俶妃六男
主夫允脩八男內侍主夫允偕餘皆早亡夫人年至五

十二有錦衾之歎孀居三十年以清慎貞潔自守未嘗
以世累溺其心晨興嘗讀佛書非有疾故雖家人莫見
穉容其高節美行自有父風享年凡八十有一歲至皇
統八年冬十月十三日遂感疾卒于佛境口誄明年己
巳十月六日葬于義龍山之麓而爲之銘曰
母子之情義無與比生不百年永以遐弃噫乎終哉卜
此幽里勒之爲銘以告于祀

誌稱夫人爲新羅王孫曾祖徵祐祖陽父上琦案
高麗史金仁存傳新羅宗室角干周元之後父上
琦據此誌知上琦祖父之名可補仁存傳之畧而

傳稱其先世又較誌為詳崔湧為沖之曾孫惟善之孫思齊之弟三子而高麗史崔沖傳但附載思齊之子淪而不及湧又載沖之孫允儀據此誌則湧為允儀之父思齊之弟三子誌又可補傳之畧矣

尹彥頤墓誌

前石高一尺八寸二分廣四尺四寸五十五行行二十一字前空二行後空一行後石高一尺八寸三分廣四尺四寸五十五行行二十一字前空二行後空一行均正書

中書侍郎平章事文康公墓誌 并序

朝請大夫右散騎常翰林學士知制誥賜紫金魚

袋金子儀撰

皇統八年 上方圖任耆俊叅付魁柄粵十二月制誥
公進拜銀青光祿大夫政堂文學判尙書刑部事所以
命賜之優渥公拜手稽首讓不遂於是坐而論道燮理
陰陽庶幾內則董正百官外則鎮撫四夷使王道復行
以致萬世無疆之休翼年加中軍兵馬判事兼東北面
行營兵馬判事乃作新三軍訓練士卒未幾熒惑犯南
斗識者皆以爲相府必有事焉公九月三日欲坐軍營
乃出門體中頗不佳即還入與室語話閒遂化去殯于
廣濟寺年六十 上聞震悼輟視朝三日命有司護葬

贈銀青光祿大夫守司空中書侍郎平章事判尙書刑部事柱國公諱彥頤字元老姓尹氏鈴平縣人曾王父贈軍器監諱先之大王父贈太子大保諱執衡王父開府儀同三司推忠佐命平戎拓地鎮國功臣守大傅門下侍中判尙書兵部事鈴平縣開國伯監修國史上柱國諱瓘贈文肅公入大廟配 睿宗公自眇齡凜然如成人手不釋書至不知飢渴寒暑凡所一見輒頌於口博學無所不通至於天文地理命書皆極其妙而未嘗與俗人導文肅公顧曰必大吾門吾復何患軋統七年十二月以父蔭登仕忽因東北面行營兵馬使所奏出

爲使令及攻加漢村旣震動敵兵急擊軍將潰亂公獨
奉元帥以饒勇追之功乃成有司褒舉焉元帥即公之
王父也癸巳爲刪定都監判官甲午春擢進士第一等
乙未遷金吾衛錄事兼寶文閣校勘庚子轉詹事府司
直壬寅直翰林院又徙殿中內給事十二月加禮部員
外郎知制誥甲辰爲禮部郎中賜緋魚袋是日出守全
州牧丙午應詔赴闕十二月歷戶部員外郎知制誥改
右司諫餘如故加史館修撰官又遷起居舍人改起居
郎己酉遷禮部郎中知制誥丁未在秋官理獄獄空二
十三日冤枉頓釋改吏部郎中餘如故遷國子司業寶

文閣待制知制誥賜紫金魚袋癸丑加東宮侍讀學士
餘並如故十二月遷御史中丞餘並如故極言利害彈
劾姦雄甲寅加禮部侍郎寶文閣直學士不久遷右諫
議大夫餘並如故嘗詣闕上萬言書悉陳古今之理亂
與夫時政之得失乃留中亦以進賢退不肖爲己任故
嘗薦刑部尙書文公公裕翰林學士權公適等數十餘
人欲斬妙清白壽翰頭懸於國門以戒後人方大金全
盛欲使我朝稱臣衆議紛然公獨諍之日主憂臣辱臣
不敢愛其死女真卒我朝人子孫故爲臣僕相次朝天
近境之人皆屬我朝戶藉久矣我朝安得反爲臣乎當

是時權臣擅命乃稱臣仍上誓表固非 仁宗出自清
衷公甚慚痛焉比來大金勒兵圍我而內亂大作益知
公鑒識洞然早知將來之變也乙卯中西民叛 上命
公爲中軍佐公首立大策成功第一及丙辰凱旋被讒
貶于梁州理行最戊午 仁宗意解除授廣州牧使許
令權赴至庚申朝謝並得施行拜官訖謝表略云臣受
貶之夕臨行之時罔知得罪之端徒極積憂之抱及覩
中軍所奏曰彥頤與知常結爲死黨小大之事悉皆商
議於壬子年西幸時上請立元稱號又諷諭國學生奏
前件事激怒大金乘間用事恣意處置朋黨外人謀爲

不軌非人臣意臣讀之再三然後其心稍安繫是立元
之請實爲尊主之誠在我本朝有 大祖光宗之行事
稽其往牒雖新羅激海以得爲大國未嘗加其兵小邦
無敢言其失奈何聖世反謂僭行臣嘗議之罪則然矣
若夫結爲死黨激怒大金語言雖大甚焉本末不相坐
矣何則假使強狄來攻我邦夫惟禦難之不遑安可乘
間而用事其朋黨者誰氏所處置者何人衆若不和戰
之則敗顧容身之無地何恣意之爲謀況臣曾不預大
華之成又不叅壽翰之薦與知常而有同否惟陛下之
所洞明 云云 以此知之公節儉正直德如羔羊朝夕往

返出公門入私門出私門入公門而已終無私友之行也仁宗深知之越戊申大宋尙書楊公應口以請路事來朝 仁宗命公告奏大宋公不曾留意於一物蓋不營產業故也子儀亦預焉忽一日康王宣送稠重公乃謝表略云臣父先臣瓘三入大朝望清光於白日二征東虜有遺恨於黃泉及廻舩忽於乳山下風濤大作舩人皆僵仆公乃正衣冠抱廻詔上舩頭除髮焚香仰天禱訖風乃定又於洋中亦然一瞬間入本朝洪州界內真至誠君子也不幸短命何其與顏回不相異也公嘗娶推忠守正安社功臣守大保門下侍中判尙書戶禮

部事監修國史上柱國贈思靜公金公若温女生七男
長試京市令鱗瞻王子擢進士第娶平章事韓公惟忠
女生男五人長宗諤次宗誨承祖蔭皆得朝名二尙衣
直長同正子讓娶殿中少監崔公温女三直史館子固
甲子擢進士第娶刑部尙書文公公裕女四曹溪宗重
大師孝惇癸亥中大選上品五尙食直長同正惇信丁
卯擢進士第娶國子監大司成金公端女六軍器主簿
同正惇義時爲大學生七早夭四女皆物故公望之儼
然可畏即之也温世皆以爲真宰相器也公自娶妻已
來出入中外未嘗與他女友此亦忠信之至也公誤爲

人忌憚罪名錄在政案 仁宗尤所痛惜特降拍揮削
去有司堅執 今上即位剛斷遂掃除所謂知臣莫若
君也皇統五年授戶部尙書六年授集賢殿學士八年
授翰林學士餘並如故方 仁宗及 今上即政日皆
隨龍焉一爲提按與夫東北面兵馬副使再爲西北面
兵馬使皆稱旨又爲南省座主及同知貢舉皆取人多
賢甲寅會枯旱 上命作月令口義講之發明大義天
乃雨每於經筵進講 仁宗賜寶帶非一也丁卯爲選
軍別監積年未決田民諍訟一切立斷又鍊定軍隊二
十萬餘人人皆服之壬戌以公爲 仁宗封冊行李接

伴公開懷與語不以夷狄待之戊辰禮行 今上封冊
 不使 主上出迎昇平門外例也凡禘祫等國家大禮
 罔不參詳一無可愧令三子共擢第以此賢室光陽郡
 大夫人金氏受國賜焉庚午四月十四日葬骨于臨江
 縣龍鳳山崇福寺東麓乃王父侍中文肅公陵寢一境
 內也人嘗與子儀曰公乃海東孔子也

銘曰

尙德哉公 萬夫之特 聰明正直 其樂也天
 學窮六經 乃至諸史 一經于心 輒誦於口
 性命之理 道德之原 孰如我公 無所不通

邦之司直 民之父師 忠孝兩立 萃于一門
發爲文章 冠映千古 夷狄聞風 畏而膽落
姦回望德 悚然股慄 功名不朽 于簡篇中

彥頤累世將相皆有勲勞高麗史有傳與誌所記
均合惟誌載彥頤字元老又載曾王父諱先之則
爲史所不及誌載彥頤七子長鱗瞻次子讓三子
固四爲僧名孝愔五愔信六愔義七早夭傳但載
鱗瞻子固愔信子讓而不及愔義誌稱彥頤以九
月三日欲往軍營出門體中覺頗不佳即還入與
室語話間遂化去此倉卒間卒於家而傳作卒於

僧貫乘之一蒲庵又稱彥頤身爲宰輔不以國家風教爲念敢爲詭異之行以惑愚俗識者譏之云案高麗諸誌凡顯官名臣多卒於僧寺其卒於家者十不一二蓋其風俗如此乃獨以此責彥頤何耶况所記且未實乎妙清之叛金富軾爲土山欲持久以彥頤議急擊遂成大功乃以文字之小嫌爲富軾所扼至於貶黜史官乃復以不以國家風教爲亟何愚誣之甚耶書此以湔雪之

崔粹墓誌

高三尺六寸五分廣二尺零七分二十二行行四十一字正書

銀青光祿大夫檢校大尉守司空尙書左僕射叅知政
事判禮部事致仕崔公墓誌

公諱梓字大用其先孔岳縣人也曾祖厚累贈太子少
師祖穎累贈太子大師父翥守光祿大夫刑部尙書世
襲衣冠其來尙矣公自少屬文及其成人以門蔭得將
仕郎掌醴丞同正年至二十四壬午春舉於禮部中丙
科及第越四年乙酉授祭器都監判官厯刪定御書亦
預公府寮屬累遷至衛尉注簿當是時

睿廟重

外之故以殿中內給事出守水州明年移守洪州皆以
剛明清白爲務兩郡之民畏之如神明愛之如父母及

代瓜期授大府注簿權知監察御史閱數月除權即真
其年按部以二州之政蹟具錄申奏

仁考聞而嘉

之擢拜殿中侍御史賜緋魚袋處於風霜之任彈糾不
法百寮爲之宸恐三載於是加尙書刑部郎中又明年
丙午六月改授禮賓少卿賜三品服出刺安西大都護
府三年秩滿左遷都官郎中未幾改爲刑部郎中又改
給事中明年加尙書禮部侍郎甲寅加朝散大夫衛尉
卿出爲西京副留守又三年丙辰改爲尙書禮部侍郎
左諫議大夫丁巳又改兵部侍郎餘如故戊午加司宰
卿餘如故己未改爲朝散大夫禮賓卿餘如故庚申加

朝請大夫是年十二月改秘書監直門下省辛酉加右
散騎常侍壬戌加朝議大夫皇統三年癸亥加御史大
夫甲子加工部尙書五年乙丑以本官爲同知樞密院
事兼太子賓客是歲改爲戶部尙書知樞密院事餘如
故六年丙寅四月加正議大夫刑部尙書樞密院使判
三司事十二月加銀青光祿大夫檢校司徒守司空尙
書左僕射叅知政事判禮部事八年戊辰加檢校大尉
是年抗章請老

上惜其致位而去三表而後從之
得請以還懸車杜門常以恬淡爲樂不以人事介於胷
次越四年天德辛未十月十五日以疾卒於私第享年

七十三歲公天資剛正清儉寡欲特立獨行無朋黨之
交自小官至宰相不營第宅娶叅知政事王嘏之女累
封爲開城郡夫人生四男四女長曰備因疾不仕娶殿
中內給事同正孫裕之女生三男四女次曰儀良醞令
同正娶吏部侍郎朴純冲之女生一男一女次曰旻內
弓箭庫判官娶分司司宰少卿黃公偉之女生二男次
曰休礼賓丞同正娶起居注李元膺之女無子長女適
衛尉注簿同正皇甫冲生二男一女次女適國學學諭
蘇良遇生一女次女適尙衣奉御同正梁楚材生一男
次女適尙衣直長同正魯敏功生二男二女是月三十

日丙申葬于京城南天德山西北麓銘曰

皇天降年 於公有永 男婚女嫁 夫婦既正

爰及兒孫 既繁且盛 積善之家 可謂有慶

梓高麗史無傳惟仁宗世家載二十三年乙丑三月辛未以崔梓同知樞密院事兼太子賓客十二月壬戌又書以崔梓爲戶部尙書知樞密院事並與誌合仁宗世家又載八年庚戌八月癸巳遣崔梓如金賀天清節則誌所不及

李坦之墓誌

高一尺四寸五分廣二尺七寸八分三十九行行二十一字末三行無字正書

故登仕郎檢校大醫少監李君諱坦之世爲益陽人少習蕭相法律比壯頗嗜醫藥會中國名醫官隨商舶至東土主上下制簡擇名家子往習其術公亦預其選而深得其妙焉越著雍困敦歲適有北狄來侵境土君考延厚以裨將轉戰却敵入據雄州城孤援絕爲敵所圍歷二歲堅守未降道路否隔無一介使來往其間者公在京師聞父被圍羸糧涉道抵定州鎮見同包長迫問父之安否兄曰近有反間來言天親染患幾亡者數日矣吾欲往覲恐被豺狼之害稽留至此公聞語即別步屐元興鎮借乘轉輸舡占百許人放

榜循花島戴星至泊邦頭浦下舡入雄州城南門見諸將問父所在尋詣幕次父尙病薦卧床見吾入拜泣下交頤曰汝之二兄二甥近在定州股戰蒲伏猶未得來一覲不意予季子子孤身披荆棘歷虎穴而得來覲我俄而謂曰吾生虜於狄人則未免跼葺之役沒入於此地則便作他鄉之鬼今幸子來雖白骨得還南國今夕雖死無所恨矣經宿大漸乃捐館于幕次以狀告行營都統都統辦喪具以助之亦使軍卒移喪于城門外高爽地依桑門茶毗之禮涉七日拾骸安函背負將還迨勁敵蟻附攻陷其城乘勝突戰无有遁逃之地抽身出

走循江涯至樵林浦泣血誓天得還京國乃安葬于京
城北年至三十有五擢第 睿宗朝及賊臣趙匡等興
兵西域與上橫行乃命將出征 公以藥食備行攻陷
賊陣終不言功浮沈下位推天假命无有怨尤居常從
容與子弟曰吾桑梓鄉有寺名曰銀海地位清曠囂埃
所不及吾欲忘世榮歸老其間至皇統九年屠維大荒
落被 朝旨出赴岱州宜佐居无何因病投効果得至
銀海寺清心辦供設□□齋炷香禮

佛玉毫次飯緇黃訖退晏坐於寶寮誦 千手真言竟
夕兀然而化 公享年六十有七寶大金天德四年玄

默涸灘歲余月也其子鸞泣請於其友曰鸞不肖早有
虞丘子之歎不得致養生前庶托文字以傳

先人不朽之節又不敢以自私予乃爲之銘曰

惟孝而知敬以行其義惟淡而无欲以守其常身雖孤
立兮志則彊心在寧親兮輕死亡善不必壽兮奄以藏
安時處順兮歸何傷

閔瑛墓誌

高一尺五寸九分廣二尺三寸二分二十二行
行二十二至二十六字不等前一行無字正書

君閔姓瑛其名本貫黃驪縣以諸陵署今解官行都齋
庫副使加檢校太子少保曾祖可舉尙書右僕射兼大

子少師祖昌京衛尉卿知三司事父孝伋監察御史母
樂浪郡大夫人金氏慶州外祖尙賓國子祭酒翰林侍
講學士君爲人豪俠少好鷹犬弋獵之事馳馬擊毬不
求仕官父孝伋爲東界兵馬判官戰沒敵國以此飲恨
必欲復讎以雪父耻適遇 睿廟征東虜之時求爲
种騎於甲申丁夾戊子己丑四年赴防每爲選鋒突騎
擒賊却敵非一二數也及一麾出守長洲縣以清白奉
公按部以理郡之事申報朝廷者再三凡歷官懷陵大
官內庫掌口俱爲稱職以借閣門祇候例調靈州防禦
使及政滿還京受大府司宰主簿軍器丞諸陵署今都

齋副使嗚呼以堂堂可用六尺之軀白口無一點之瑕
而白首下僚然天性情淡不以卑官薄俸有憔悴之容
不其偉歟舍兒起居注閔脩早世兄弟姊妹五六人相
次化去撫兄弟姊妹之子皆猶已子養母孝謹母享年
九十四歲君娶工部尙書洪德成之季子戶部令使同
玉洪賴之女生四男一女長曰利誠登仕郎直史館次
曰光文登仕郎良醞署令次曰口和知公州事判官卒
季口口秀長醞史同正一女嫁刑部郎申金龜符之子
君實今爲內侍秘書省校書郎君忽遺疾於庚午年十
一月十九日卒年七十六歲至壬申十一月十二日壬

寅骨葬于開城府界內海晏寺北麓 銘曰

番番仡仡 宜交宜虎 積善之慶 克昌厥後

大金天德四年壬申十一月日右正言知制誥全于

蕃口

洪圓寺僧統教雄墓誌

高一尺五寸八分廣二尺零八分二十九行十四字正書額篆口洪圓寺僧統墓誌

洪圓寺住持悟空盡性性圓圓證正覺出纏了性見性

通炤正觀寂炤法印超悟僧統諱教雄字守雌俗姓康

氏雞林屬郡章山人考貞白祖貞攝母周氏父周碩皆

郡吏也師為人聰敏器識拔群年十二投歸法寺大師

戒明祝髮於其年受具足戒比壯就僧統理琦門樞衣
講業凡學者莫敢與爭能崇寧二年癸未赴僧選一中
高弟其志尙不願顛窶於名路超然口無尋智國師遊
太伯山遂以盡一性之宗窮萬相之理而名益著屬
仁宗以至誠嚮內問可使弘揚聖教者誰歟無尋智國
師薦之曰莫如師由是 仁宗甚厚遇而當時公卿學
士大夫亦莫不敬重實華嚴一宗近也其立風勝益所
以薰發動植者豈可思議哉然達人顯晦唯變所適故
天德五年四月八日丁卯卒于興王寺樂寂齋十四日
癸酉依本教荼毗越五月十四日壬寅葬遺骨于進奉

山東南麓春秋七十五僧臘六十三門弟三百餘人皆欲其成德之不朽誌其墓曰

普賢行海浩浩無涯惟師游泳物無不滋文殊智燈旁燭無外惟師挑明盲瞽皆會惟師之德至大至剛惟師之壽死而不亡門徒三百墳以葬靈惟師乃宅既安且

李仁實廟誌

高一尺二寸廣一尺五寸一分二十行行三十字正書

口相國李公廟誌并銘

公姓李諱仁實字子虛卒見州人三韓功臣音律六世

孫也母曰大夫金氏卒新羅王之後也九歲屬文未弱
冠入成均試二十有六歲登丙科第學通六經諸史尤
善理春秋出補羅州書記有政聲始爲通義府錄事會
睿廟始立學養賢以品兼學諭訓導諸生有功累遷
國子博士兼直史館有春秋諍義行於世出守交州行
寬猛相濟之政百姓畏如神明焉善政升 聞入爲右
正書知制誥言事改授殿中內納事口加右正言歷左
右司諫至中書舍人諫議大夫又歷御史雜端知臺事
至御史大夫前後出入臺省數十年間讜言高論多所
發藥 仁廟益思大用擢授同知樞密院事以知樞密

事判三司事又遷左僕射叅知政事判刑部西北面行營兵馬事以守司徒門下平章事代門下侍中任公判吏部事一年尋託疾致仕口閑四載至大金貞元元年癸酉十月二十六日卒於私第風神不減平時焉享年七十三稔 上遣工部郎中庾祿公行吊尉仍命考功郎中吳日就 勅許祭奠贈特進檢校太師守司徒門下侍郎同中書門下平章事判吏部事監修國史柱國諡曰文貞公越十一月初五日命有司備鹵部葬送以終之爲輟朝三日公於諫議大夫時掌成均試知樞密院事時主盟春宮皆有得士之稱及捐館之日如魯國

諸儒喪孔子咸歎山頽木毀助嚴大事以哀之益見公
之用心也噫公之祖先皆享高爵重名而未及知命而
卒公獨位極人臣命盡天年者非隱德在人而何是以
君子謂公之子孫必有達人也銘曰 天生我公 既
明且哲 爵德兼豐 以垂威烈 勒石紀辭 以耀
萬世 泰山可移 此字不毀

仁實高麗史無傳而仁宗毅宗世家記其仕履甚
詳與誌互有詳畧惟毅宗世家記元年十二月丁
巳以李仁實爲尙書右僕射參知政事誌則叙於
仁宗時右僕射又作左僕射又記三年四月辛酉

以李仁實守司空門下侍郎平章事誌則作守司徒爲畧異不知世家與誌孰爲得也此誌標題作李公廟誌不曰墓誌與咸雍十一年崔貞肅公廟誌正隆六年莊平公廟誌貞祐十五年任公廟誌同中土無此稱也

尹誦墓誌

高二尺一寸一分廣三尺五寸九分三十四行行四十六至四十七字不等前空二行後空二行正書

卒高灝國三重大臣開府儀同三司檢校大師守司徒尙書左僕射叅知政事判尙書工部事柱國贈諡烈靖公墓誌銘 并序

寶文閣校勘文林郎尙食奉御同正黃
文通

撰

公姓尹諱誦字未詳舊名諧其先春州橫川縣人功臣
新福六世內孫

大祖六世外孫也皇曾祖諱守玄追封工部尙書皇祖
諱修己追封右僕射戶部尙書上將軍皇考諱祚明追
封右僕射行刑部郎中兼太子中舍人外祖諱庾說檢
校太子詹事奉功臣黔弼之後也公年八歲丁父憂十
歲丁母憂依姊居越 文宗大康十年甲子國子祭酒
金公覲門下中南宮試是時宋元豐五年也至 宣

宗大岌四年戊辰相國崔公思諫崔公與下登進士第
屬內侍六年庚午拜秘書校書郎

肅宗壽昌五年己卯轉直史館未就尋轉權直翰林院
軋統三年癸未以殿中內給事出知靈屈郡理爲第一
按部以褻狀聞于朝七年丁亥拜試閣門祗候

睿宗天慶二年壬辰以戶部員外郎出守廣州牧居三
年春以禮部員外郎知茶房事還累遷禮部侍郎寶文
閣直學士知制誥宋宣和四年壬寅也明年

仁宗命公注貞觀政要以進屬丙午春大內火公抗身
衛社功載大史丁未春提舉南省試取進士明經一

百餘人其間銳於登仕者如內侍大府少卿徐淳禮賓
少卿兼御史雜端韓靖相次而達者高子思許勢脩李
唐仁崔仲居張令卿金承溫陳玄光皆當世聞人也王
子夏以金紫光祿大夫守司空尙書右僕射判工部事
致仕癸丑秋八月奉

王旨撰集古詞三百首名唐宋樂章一部又於大金皇
統六年纂大平廣記撮要詩一百首隨表進呈 上教
遣知奏事崔惟清辨論曰卿年高聰明藻思如新嘉歎
不忘其年冬十有二月加檢校大師守司徒叅知政事
柱國又據唐玄奘法師西域記撰進五天竺國圖

上覽之賜燕系七束仍 命右承宣金存中諮問樂譜
其遭遇之盛千載一時歎公平生倜儻有大節敏於文
學達於政事該通音律尤工歌詞晚年嘗讀內典再赴
閣門養老宴親獻手寫法華經一軸

上乃宣勸仍 賜物尤渥貞元二年甲戌秋七月十六
日丁卯病革儵然而化春秋九十二

上爲之震悼贈謚烈靖公 命有司監護喪事是年八
月三日甲申葬于京東法雲山之麓公之夫人王氏卒
生五男三女長試閣門祇候永濬次重太師警韶次進
士永洙與三女皆先亡次殿中內給事同正永湜季禮

賓注簿同正永源永濬永源以異才擢第春官可謂肯
堂矣永濬已沒永源今不逮祿養良可歎夫

其銘曰

噫公之德 邦家之光 厯事六聖 柱石廟堂

芝蘭馥馥 金玉琅琅 惟仁故靜 厥壽乃長

解組而退 二紀于茲 上曰元老 擢實宰司

終始惟一 大節險夷 逝川難住 今也胡爲

傳億万祀 令聞四馳

誌稱公姓尹諱誦字未詳舊名諧檢高麗史尹誦
無傳而有尹諧然考其事實則同名而非一人也

惟毅宗世家載八年甲戌五月癸丑朔參知政事
尹誦卒而據誌則誦實卒於貞元二年甲戌秋七
月十六日丁卯史官所記殆有誤也誦以文學侍
從歷事六朝年躋大耋位登台輔文學政事皆有
可觀而史官不爲立傳僅於世家一記其卒年而
又譌誤則此誌之存足補正史乘之闕誤烏得以
其爲外裔石刻而忽視之歟

朴脩墓誌

高一尺四寸五分廣二尺二寸一分
二十六行行二十一字正書

朝散大夫檢校尙書右僕射司宰卿知尙書禮部閣門

事兼大子中舍人賜紫金魚袋朴脩字子隨平州人也
公之始祖蓋新羅貴姓人立祖功臣三重大匡守卿當
大祖平定三韓時身冒矢石厥有成績紀于大常肆食
采于平州遂以爲鄉後世子孫因之公自少好讀書博
通經史發爲文章淳厚爾雅時號第一年二十六中進
士第例受慈州悴秩滿補貢于寶文閣校勘至帶詹事
府司直動兼校勘之職俄拜右正言知制誥越壬戌年
出守洪州視事公平決獄無疑政譽籍甚是時
仁宗御宇聞而嘉之奈忤貴戚降授察院非上意也不
久拜殿中侍御史至丙寅年

今上踐祚擢爲

知制誥自此已後翱翔臺閣清風凜然一發議論皆中
時病真得諫臣體前後出按西南者凡有三皆以澄清
爲意問民疾苦悉盡除之嚮者奉使大金不以財利掛
心動有光華不辱君命歲在癸酉充東北路知兵馬事
振細柳威折衝未然隣敵聞而喪膽是年自兩界至南
地州縣皆補軍卒公乃夙夜勤勤精選軍士甚合人言
尋加大僕卿知禮部事屢箴闕禮雖孔邊之多聞無以
過也或遷國子祭酒循循然誘人諸生仰之如泰山北
斗或知閤門事凡朝廷禮度惟公皆正焉堂堂風采可
使與賓客言也忽遇疾彌留於丙子六月九日薨于崇

教寺經院行年六十歲也凡人之聞者無貴賤皆下涕
取九月三日卜吉地于城東大雲寺西麓而藏骨焉公
娶平章事崔灌之女生一女今適儒者丞同正林軌又
有四子不合仕官皆從浮畝氏惜乎無子繼箕裘之業
云爾謹誌

第三僧靈偉書并刊字

脩高麗史無傳惟脩之玄祖守卿高麗史有傳爲
開國時功臣誌稱嚮者奉使大金不以財利掛心
動有光華不辱君命而不記使金之年據毅宗世
家脩如金賀萬壽節在元年丁卯十一月丁亥可
補誌之畧誌稱脩翺翔臺閣清風凜然一發議論

皆中時病真得諫臣體而不舉其事實東國通鑑
毅宗紀五年辛未五月宰相崔惟清文公元庚弼
等率諫官崔子英王軾金永夫朴脩等伏閣請罪
鄭叙及鄭誠八月諫官及侍御史金諒等伏閣言
事三日不報省宰皆乞罪不視事召文公元庚弼
金永錫崔子英及諫官金子儀王軾朴脩李元膺
李陽伸尹鱗瞻臺官崔允儀金諒閔愨韓靖慰諭
視事皆不奉詔高麗史毅宗世家亦載之知脩實諫臣中之錚
錚者誌之所言爲不虛也誌稱脩四子皆從浮屠
氏文後有欵一行云弟三僧靈偉書并刊字殆即

倚子之從浮屠氏者書法極清勁爲高麗誌石中
至精者乃不曰第三子僧靈偉而曰弟三僧則可
笑也

李輔子妻李氏墓誌

高一尺五寸一分廣二尺七寸
六分二十九行行十六字正書

卒大中大夫兵部尙書同知樞密院事李公輔子妻平
涼郡夫人姓李氏三韓功臣太匡弓烈五世之外孫監
察御史諱琬之季女也少善女工爲人能勤儉有令德
及長崇內教多誦佛經性柔順有羞耻非有大事不出
門域雖姊妹叔伯莫得窺其面宗族皆重之年十六歸

李公家初李公之未卒也以忠儉有寵於仁廟掌握國柄口居喉舌清白嚴重聞於一時而夫人莫不同心希旨內助其德雖家甚懸磬而猶以義樂貧晝而紡績夜以裁縫勤而旡馱家政乃行上奉君子下率諸兒洎及戚獲僅數十人能收恤畜養似旡不足至於飲食必以均分誠母道也女道也每人有饋獻於其門者雖親戚故舊之所遺苟旡李公則夫人皆拒之以待公之來也而問其可否然后去取焉由是位益尊而家益貧名愈彰而節愈固古之君子夫賢婦正未有若此其盛也夫人素多病及疾將死乃洮頰唱佛不錯一念顏色甚

白神必死撓以公之卒十一年丁丑八月朔甲午終于
家享年五十九歲有四子長名唐宰次唐柱次唐俊次
唐泌皆仕顯官越明年二月二十三日甲寅葬骨于開
城北毛頓洞甲來庚向山麓而爲之銘曰

婉婉夫人 既賢且姝 出於公族 配賢大人

而生四子 以此勤劬 吁何不永 一旦而逝

自口盛德 久必不蔽 刻銘于石 以告万世

僧之印墓誌

高一尺四寸七分廣三尺四寸七分三
十八行行二十至二十二字不等正書

海東廣智大禪師墓誌銘

大金正豐三年秋廣智大禪師卒其門人請予誌其墓甚勤辭不獲已乃爲之辭 師諱之印字覺老自號靈

源叟考 聖祖睿王母毅氏爲 王之媵以契丹軋統

壬午夏六月二十六日誕於私第師生而岐嶷不

喜葦血體貌言音酷似 睿王睿王鍾愛之年九歲命

投慧炤國師祝髮學禪那法道機夙成若天稟然年十

五中佛選已亥歲 詔住法住寺丁未歲拜三重大師

實 仁廟在宥之六年也壬子秋加拜禪師師旣得重

級狀其繁華上書請避住持事寄身林越 上曰以道

處之市朝即是青山乃阻其請及 今上即祚之二年

丁卯別降 枇墨加大禮師己巳年 上以御札親灑
法号廣智叢林衲子无不歆艷師以謂饗寵而居非衲
子意乞歸所住智勒寺 上亦不許己亥歲以鈴平金
剛寺距京不遠可以託身乃往居之 上每遣中使餽
問无日无之師恨其山淺以丙子春卜朱溪縣裳山小
寺即欲遷去上知之遣近臣徐淳固留之優加犒諭師
乃留數月至夏五月更煩訴乃遂其請居无何 上詔
赴京師師牢讓不起丁丑年 上又遣近臣徵之辞不
獲已來赴 闕下賜對壽德宮大平亭上 玉色親臨
冥示慈惠寵眷甚渥无與比者自法住至智勒坐道場

者五師之語要具如別錄師器識宏遠禪學外兼該教
觀又善屬文尤於古體詩得妙平生接人雖至踈賤必
與之鈞禮以故人皆願爲弟子雖殊方絕域珍寶人式
求之即與之口方丈蕭然餘經書圖畫尔嘗以服玩餘
貲營轉輸大藏於雙峯智勒兩刹其功德不可殫記越
戊寅秋七月遽嬰旦疾八月四日疾病剝沐更衣說偈
將欲化去問是何日門人報辰日師曰辰已爲俗所忌
吾當避之至十二日又作偈示衆曰吾生五十七返卒
是今日性宅周沙界遽蘆室寄質偈畢翛然長往火其
柩於鈴平山之西麓享年五十七臘四十八是年冬十

一月二十八日藏其骨于朝陽山之東麓禮也其銘曰

曹溪鏡裏 无一點塵 得其妙明 能有幾人

累我廣智 密契玄真 叢林仰止 如星拱辰

爲時之瑞 如五色麟 猷世而去 儵然蜕身

醍醐无味 蒼筤口春 歲月漸遠 草木蓊蓊

恐其偉蹟 遂湮而淪 茲用作誌 勤于貞珉

文林郎試大厝丞兼翰林院林 宗庇 撰

誌稱之印爲睿王子而高麗史宗室傳不載睿宗

子此可補史氏之闕誌署正豐三年正豐即正隆

高麗史毅宗世家十年丙子閏月金改貞元四年

爲正隆元年避世祖諱以豐字代隆字行之案玉
海記高麗年號有正豐不知其即金之正隆也附
識於此以正之

崔誠墓誌

高一尺五寸五分廣三尺零一分四十
四行行三十四至三十五字不等正書

高麗國卒金紱光祿大夫特進檢校大尉守司徒中書
侍郎同中書門下平章事判尙書刑部事贈諡文簡崔
公墓誌銘

公諱誠字子和姓崔氏其八代祖書遷漢南人漢南今
之水州也書遷有二子其季諱韓用入朝仕至侍中始

居京師其後世爲王京人侍中有一子諱融銳官至僕射僕射有一子諱士威有大功於顯宗代官至大師內史令配食廟庭內史令有五子皆貴自口口番以大而其長諱忠恭官至御史中丞於公爲曾王父也中丞有五子其長諱惟恕官戶部侍郎贈尙書右僕射於公爲王父也侍郎有四子其長諱繼芳官至守司空尙書右僕射叅知政事判三司事贈諡和順是實生公母曰歸城郡大夫人閔氏閔門祗候閔寧之女也公自少穎悟勤于學問年十二以門功補良醞丞同正更折節讀書年至二十一睿祖親試儒士以公文擢寘乙科

第五人調授寫經院判官召入內侍轉八品七品官兼直翰林院文詞典贍爲時輩所推伏 仁考在東宮時嘗一日侍 上前 上語及時才謂公文可以任 誥命及 仁考即政之第三年擢授右正言知 制誥五年二月朝鮮公李資謙之黨拓俊京等犯 闕內外相拒俊京等積柴東華門付火連燒 上迺惶遽出御南宮公時口中書棒 國璽赴 行在始終侍衛事定遷左正言明年出倅尙州牧口蹟克著秩滿入爲右口諫九年秋冬出爲全羅路按察使兼點軍使使還改殿中侍御再遷侍御史起居舍人兼 太子文學十二年春

夏出爲開西路按察使還拜試禮部郎中明年丁歸城
憂去職起復改試吏部郎中十四年加起居注吏部郎
中充東宮侍讀事公之在中書同列有鄭知常者西京
人也與妖僧妙精日者白守翰密人金安等連結有異
志以陰陽不軌之說眩誤 上意千謀萬計期濟其姦
當時在朝者非鉅儒大賢無不服從或畏懾詭隨者有
之公與知常素不協終始不參其議至是年妙精與西
人叛逆知常等伏誅然後知公有遠識達鑒也 仁考
嘗與大臣論其事謂公曰崔誠可謂有特操者也自此
眷注益深連歲升擢遂加國子司業十六年秋冬出爲

楊廣忠清路按察使俄拜試中書舍人賜紫衣金魚及
八開會 宣召侍宴加 東宮侍讀學士試御史中丞
十九年以禮部侍郎翰林侍讀學士典司馬試稱旨是
年以賀節口使入朝大金明年還國以借禮部尙書知
西京留守事居留三年入拜禮賓御寶文閣學士轉左
諫議大夫司宰卿修文殿學士皇統六年 今上即政
授右散騎常侍口 命同知貢舉典試口士時稱爲得
人遷國子監大司成翰林學士十年春夏出帥口口路
兵馬至營未數月 召拜同知樞密院事遷知院事翰
林學士承旨判三司事再遷口口口口部尙書尙書

右僕射累階至口進檢校司徒公自左右正言至樞密使無一官不口制誥故數十年之間誥命訓辭多出其手貞元元年疇咨登庸物議攸屬遂擢爲政堂文學判尙書禮部事時有權臣不喜公者密誘省閣指摘瑕疵累上章奏上廼命有司推究其事不數年其事明辨正豐三年復用爲守司空中書侍郎同中書門下平章事判尙書戶部事改判刑部事加金紫光祿大夫檢校大尉守司徒公之爲人非特文章爲口宗匠其字量沉重有智略練解朝章多識典故備歷諸曹裨益尤多及居輔相感於口口其所以致主安民之術夙夜

憂勤靡懈不覺疾之在體五年六月二十八日告疾

上遣御醫 賜湯劑諭以調養疾大革以七月十三日

薨年六十七 上聞之震悼輟朝三日贈謚文簡 賜

之布粟其葬物有司官給之 命近臣監護是年八月

壬申葬于東西黃鳳山之□□初娶平章事金沾之女

封江陵郡君子男一人光世今爲知仁州事副使女一

人適雞林□□後娶平章之兄侍中仁存之女封江

陵郡夫人□男三人光陟內侍前興威衛錄□□□

□丞同正光鈞內侍寫經院判官女一人適權知閣門

祇候李世儀凡四男二女光□光□光謙並嗣家業取

科第其季亦志于學將有所樹立口外孫男女幾二十
人銘曰

口口顯姓 肇自新羅 爰及本朝 名爲大家

惟公之系 口以德基 始從漠南 徙居京師

綿綿繼繼 代有名卿 至于我公 以文有聲

公之寵貴 爵于三公 克施克守 克樹厥功

餘慶方興 子孫之承 乃子及孫 愈久益蕃

焯其行事 國史之傳 又刻銘章 垂千萬年

此誌記誠先世世系甚詳稱八代祖書遷季子韓
用韓用子融銳生士威士威五子長忠恭生五子

長惟恕生四子長繼芳實生誠高麗史崔士威傳
但載父融父不及父以上融父即此誌之融銳而
傳世之崔士威墓誌則又作融藝此誌作銳者殆
誤也又士威誌載其先世與此誌亦有異同此誌
之書遷士威誌作徐遷此誌稱士威五子士威誌
則作有六男殆亦彼誌是而此誌非也誠無傳而
仁宗世家載二十三年乙丑十一月丙午誠與右
常侍裴景誠上書言事不報毅宗世家三年戊辰
三月辛酉誠與中書舍人崔允儀等請黜內侍金
巨公臣者之淑等七人王不聽崔誠等伏閣力爭

凡三日乃從之此誠政蹟之卓卓可頌者誌乃均不之及毅宗世家又記三年己巳四月辛酉以崔誠爲工部尙書四年十二月戊辰以崔誠爲兵部尙書誌亦不及誌稱仁宗十九年以賀節口使入朝大金明年還國仁宗世家則誠如金賀萬壽節在十八年十一月丁未則二者之異同未知孰是矣

補遺卷三

洋身金不才

三
希古樓刊

海東金石苑補遺卷四

吳興 劉 承幹 校錄

尹裕延墓誌

高一尺零二分廣一尺四寸四分十二行行十四字十六字不等正書

正豐六年辛巳九月二十一日酉時卒儒林郎檢校戶部尚書行戶部員外郎賜紫金魚袋尹裕延父檢校軍器監行大樂署丞尹壽祖檢校太子詹事尹衡曾祖檢校太子詹事宗元外祖檢校左僕射行太僕卿河忠濟長男尚衣直長同正承解中男軍器注簿同正光緒小男春坊侍衛公子戶部令史同正元紀一女先故夫尚

衣直長同正趙仁成二女夫軍器注簿同正楊子綸三女夫尙書刑部令史宋赫忠

原

巨者本貫守安縣

金臣璉墓誌

高一尺四寸廣一尺四寸九分十九行行二十六字二十五字不等正書

高麗國卒朝散大夫尙書右丞京兆公墓誌 并銘

公中和縣人也姓金名臣璉尙書右僕射如瑑生中書平章事若珍若珍生戶部侍郎知榦知榦媿戶部尙書金義忠女實生公焉公初以先祖蔭職便接朝聯除金

州判官勸農桑輕徭役一介不取於民民到于今受其
賜考績已遷越七年真拜迎送都監錄事 仁宗召爲
內侍以叅秩出守開城府政迹如初政滿遷權知閣門
祇候是時 仁廟在位十二年也西都人逆命 上命
將徂征公調爲前軍兵馬判官被堅執銳深入敵場爲
流矢所傷其爲赴戰忘死如此班師之日以軍功遷試
殿中內給事及遷都官刑部貢外郎帶三司判官戊午
歲以生辰迴謝使入大金國大金人稱爲膚使以選軍
使大闕公洪州界士卒編其行伍老幼宜之越庚申年
除尙州牧副使聽訟如流官無留事吏民愛如父母入

莅右司工部太府軍器無不稱職 上惜其年老卓遷
爲試尙書右丞一歲之中除其試口公於壬申歲年當
七十上章乞退家居一紀氣骨剛列朝廷謂之國老公
姬守司空柳子維女生子二人女三人子皆居爵位女
悉嫁公卿子弟各有孫支公大金正豐六年辛巳四月
二十日卒于家五月六日焚棺是年十月三日葬骨于

京城東

松林

山南麓銘曰

猗歟國老

公卿之雄

克勤克儉

石口膚公

茫茫黃壤

忽迷西東

芳名不朽

皎日懸空

臣璉高麗史無傳惟仁宗世家十六年戊午十一

月已丑遣刑部員外郎金臣璉如金謝賀生辰誌
稱戊午歲以生晨迴謝使入大金國與世家正合
臣璉之母爲金義忠女知同姓爲婚高麗之所不
禁也

王倬墓誌

前石高二尺四寸二分廣二尺一寸三十三行行三
十六字額題贈諡莊平公廟誌銘八字後石高二尺
四寸二分廣一尺七寸二分計十四行行三十六字
正書

贈諡莊平公廟誌銘

公諱倬字敬天姓王氏 肅宗第五子母曰明懿太后
柳氏 睿宗之同母弟也性正直仁慈自少有忠孝之

誠留心三教 肅考偏愛故幼承稱名之禮 上降詔
曰延德官王子汝生而括驗性有忠孝是頒密命 賜
名爲倬遣使攝工口尙書攝金吾衛上將軍崔廷 賜
銀器匹段布貨穀米鞍馬 肅考常與后曰子女雖多
是惟孝子人子以孝爲本故 賜名爲從人從孝之字
公年十三歲乙酉 肅考升遐隨母后居宸禁軋統六
年丙戌二月 睿朝 賜爵爲奉義同德功臣開府儀
同三司檢校大口守司徒兼尙書令上柱國大原侯食
邑二千戶食實封三百戶越丁亥十一月 上幸西京
命尹灌吳延寵爲元帥往戍東蕃 命公爲留守

王京待還 駕而復 命越軋統八年戊子歲四月加
檢校大保越翌年己丑三月丙子朔六日辛巳 上降
詔教曰汝 肅考之愛子而 朕之寵弟也肆頒爵
命以口寵靈遣使爲三重大匡開府儀同三司檢校大
師守太尉門下侍郎同中書門下平章事判尙書戶兵
部監修史上柱國崔弘嗣副使守司空尙書右僕射崔
廷持節備禮冊 命爲奉義同德功臣開府儀同三司
檢校太保守司徒兼尙書令上柱國大原侯食邑三千
戶食實封三百戶并 賜印綬衣對匹段布貨銀器鞍
馬越軋統十一年辛卯歲正月除廣孝功臣守太尉是

年十二月 命門下降官誥曰母殿承顏罄孝嚴而不
匱 王庭共職効補益以居多凝績用以有聞示旌酬
而何愆是用授重資而彰德錫美稱以表功越壬辰歲
母后升遐翌年癸己歲 上以母后平昔所持明福宮
司田土奴婢并鑰一封 賜之越天慶四年甲午歲十
一月 上幸大廟附太后神主 命公從駕爲亞獻是
年十二月除守仁功臣大原公食邑三千五百戶食實
封三百五十戶越乙未歲三月 上命襄簡公之長女
李氏爲公妃遣朝散大夫尙書右丞直門下省兼太子
少詹事 賜紫金魚袋崔弘宰 賜匹帛布貨金銀器

鞍馬至七月加檢校大傅 命門下降誥曰口不言非法之事身不近無法之人盡忠孝於君親篤友恭於兄弟是以 先帝有鳩鳩之政獨蒙偏愛之私寡人分帶礪之封超越大邦之寄洎 朕除亮陰之時於廟附聖妣之後乃助祭於九口亦隨謁於二陵是敢爵爲上公食加大邑越壬寅歲正月除守大保三月 命門下降誥曰眷此賢公曰予寵弟 肅考所以加愛 朕心豈敢遺忘爰據邦彝且優禮數并下教曰卿 肅考之愛子也而 朕之寵弟生於富貴克自卑謙出入起居罔非有法視聽言貌罔非有儀實爲宗藉之英茲乃

王家之衛位雖魁於五等望未然於三公不有異恩曷
旌乃善肆褒陞於茂秩且務稱於寵光至四月夏 睿
廟升遐五月 嗣王以褒大叔之禮 賜贊化功臣食
邑四千戶食實封五百戶九月又教加檢校大師惟
嗣王亮陰之際外家擅權國勢幾危惟公一節衛安社
稷權臣僞 命口于江南歲在己酉 上命降中使迎
于王京是年十二月口九日下批爲奉順同德守節贊
化功臣開府儀同三司檢校大師守太保兼尙書令大
原公食邑三千戶食實封五百戶回降教書曰貶在嶺
南不出權臣之謀召還輦下盖追 口帝之友于 賜

之第宅之新加以物般之渥遣差使樞□□右承宣尙
書刑部侍郎知制誥諱惟忠賈詔往彼□□甲第
一區并賜金銀□□段鞍馬布□癸丑歲公妃季氏
卒葬于京東松林山麓甲寅秋七月再授守義功□□
□師命門下□誥曰眷時叔父之親爲我宗室之舊
歷事三朝永肩一節已未歲又加佐理功臣丙寅歲又
加輔靜功臣食邑四千戶食實封七百戶丁丑九月又
加勵翼功臣歷事四朝始終一節公尤信內教頗趣老
氏或不出仁義故鑄造釋道儒家之文今附于興王寺
教藏寶福源宮栖真□國府書籍店□貴而且壽官至

奉義口德廣孝守仁贊化奉順守節守義佐理輔靜勵翼功臣開府儀同三司檢校太師守太師兼尙書令上柱國大原公食邑四千戶食實封七百戶正豐六年四月十日壬子公年六十有九老病而卒殯于京城康濟寺 上遣使吊祭誄書曰孟子曰天下有達尊三爵一齒一德一公盡有此三者口口之爲人儀表異常幼稟聖訓早膺寵光去邪從儉守口惟長備歷四朝忠無它腸吾聞仁者必壽而康謂宜善攝百歲方強年甫縱心忽尔云亡 上心震慟國人悲傷從臣作誄霑衣裳贈謚爲莊平公口十八日茶毗于京東山麓收拾骸骨

權安于因孝佛院是年十一月壬寅卜宅兆葬于義龍山東麓而銘曰

崇信三教

正直仁慈

捨浮取實

從儉去奢

歷事四朝

善始善終

高麗史宗室傳載倭事實頗詳與誌均合惟傳載

睿宗五年加廣孝功臣守大尉誌則在乾統十一

年辛卯

即睿宗六年

先後差一年又傳載仁宗七年召

還後食邑三千五百戶誌作三千戶至仁宗八年

以後倭之晉職加邑誌載之甚詳及死後贈謚傳

皆失書又誌稱倬之卒年在正豐六年四月

即毅宗十

五年而傳則誤作毅宗二十四年皆當據誌以補

正史氏之脫誤也

林景軾墓誌

高一尺八寸九分廣三尺二寸四分四十七行行二十七字末二行無字正書

大府少卿林景軾墓誌

公諱景軾字大虛安東府管內口州人祖追封大子少師子高**考檢校**大師守司徒門下侍郎平章事幹歷仕三朝一於清儉位雖在於黃閣其心與布素時無毫髮差也妣戶部侍郎金義先之女樂浪郡大夫人也公

以父蔭初授將仕郎軍器主簿同正初任禮州通判秩滿上闕尋拜景靈殿判官歷六官而勤於

王事出爲梁州防禦副使仁政治於境內民多德之入爲試典廐署令越二年拜權知監察御史例出安北大都護府判官官寮客館一皆殘敗公爲之作新几執用之具軍旅之儀無不畢備而掌握之內各得其宜則古之邵父杜母之政何以加此由是入拜大府寺丞權知監察御史尋遷北界分臺改授閣門祗候自閣門授忠清州道選軍使得其大體精選士卒畢選復命尤承宣李元膺傳宣弊諭士大夫聞之莫不歎羨是

亦公□□□□是歲今

上御宇之八載貞元二年甲戌也擢遷試尙乘奉御

賜緋魚□□都官刑部右司貪外郎以賀正使入北

朝不失其節遠而有光□□司郎中越明年授全羅

州道春夏□按察副使完山境內盜賊□□群樹黨

殺越人于貨愍不畏死而蜂□蟻□依險阻不可爬

□□□之內爲之騷然則前後觀察雖欲□禾除害

其可得乎公獨奮然□斷一旦掃盡積年之弊則可謂

雄□不常者矣以此有司奏聞擢授大府少卿 賜

紫金魚袋又加檢校戶部尙書以大府少卿授西京□

司監軍使以今辛巳七月二十一日因病卒。其官年六十三。以八月二日茶毗于東漢橋外大城山東南洞。口口以骨遷葬于王京瑞雲寺南麓。禮也。嗚呼公之爲人也。善繼家序之清風。廉安溫厚真君子也。幼而學之。博覽經史。不拘深解。雖未得登第。而其才華優。口口有其比。口口性愛賓客。右琴右書。尤不忘於布衣之交。從容宴會。少飲輒醉。東山口興竹林之遊。未嘗忘於方寸。其在監軍時。有一長者來至其所。公欣然設席作詩一首。以贈之。隔不數日而卒焉。其詩口承。

命才經八九旬。就中風景住三春。有時談笑因君樂。無

限江山屬我新一卷經文真外友數篇書冊座中塵此
口句得無詩之識乎其詩之尾不錄者以傳誦者遺忘
故尔公先娶朝議大夫判少府監事康福輿之女而生
四男三女長子軌妙年擢第曾任江華縣尉次子惟勝
落髮以重大師住持宿水寺次子口口蔭受良醞令同
正次子瑀亦以蔭受戶部主事同正僧俗四子口口挺
出皆賢嗣口長女早世次女配衛尉丞同正河適仁次
女配尙食直長同正李自得後娶守司徒門下侍郎平
章事判吏部事崔子英之女而生二男二女長子國子
學生球次子及二女皆孩幼而未成人也噫予與公自

非角之時同學於雞林朴氏及其登仕悲歡窮泰未嘗
不與首尾四十有餘歲則知公之行狀惟我而已諸子
亦知爲父之親舊請余爲銘不敢固辭而作銘焉銘曰
偉歎口公 幼而學之 清白傳家 布衣之交
相口之後 直諒爲友 性愛忠厚 窮泰不負
口口憂勤 使於異方 巡按嶺南 草賊滅蹤
廉平獨守 義行群醜 威振日久 到頭無有
弊論之言 形骸雖亡 士口仰之 恩及子孫
自天而口 功不可朽 泰山北斗 孰能爲右

崔允仁墓誌

高一尺四寸八分廣二尺三寸六分十四行行二十一至二十六字不等正書

正豐六年九月九日知洪州事使誠殿中內給事崔君年五十以疾卒二年以閏二月五日葬松林縣西山之麓而子正思來求銘噫口故人也爲序而銘焉序曰君諱允仁其先海州人君曾大父口惟善守大師中書令君大父諱思齊中書侍郎平章事口父諱淪左司郎中初以甥舅工部尙書知樞密院事李資德蔭調尙書戶部令史同正旣而中進士第通判成州政績爲天下第一累官至於斯娶國子祭酒翰林學士寶文閣學士知口口權迪女生六男二女男曰正思文悅道樞三人前

此皆剃度□□門其餘三人皆幼孤與二妹隨母君於
分不收於欲不求□學□力亦其天性故其孝友睦淵
任恤莊靜謹潔稱□幼稚以至壯長成不充其志施不
其材此□士大夫□儻朋友間所以哀其死而歎惜流
涕者也然君文學政事言語已能自達於一時其於仁
義道德性命之理亦何求之而不得聞矣而有疑嗚呼
可謂賢已雞林朴文爲之銘

仰觀乎天 命有短長 君何爲善 俯察乎地
孰主張是 不幸而死 陵谷易位 猶生之榮

□聞不已 何嗟及矣

允仁爲惟善之曾孫思齊之孫淪之子允儀之從兄弟以位不登顯仕故崔沖傳不載其名此誌刻石棺之上棺之四周刻十二月神唐人誌石有刻十二月神於誌側者此蓋仿唐之遺制也誌稱娶寶文閣學士知□□權迪女考權適墓誌載適長女姝崔允仁知權迪卽權適人名而任意用同音假借之字殊爲不合又據適誌知□□乃知制誥可據補此誌之闕文

金之瑩葬誌

高一尺五寸四分廣一尺零一分
五行行十一至十二字不等正書

本貫高麗國成州

亡故儒林郎檢校太子詹事行監察洙史金之瑩正豐七年壬午五月十日丙午葬于屯山

正豐七年壬午五月日 謹記

考正豐止於五年正豐七年即大定二年此尙稱正豐者蓋完顏堯方行篡逆尙未通告外邦毅宗世家十六年壬午十一月戊申金遣大府監完顏興來告即位十二月遣金永膺金滄夫如金賀登極蓋直至壬午冬始知其新紀元故是年五月仍稱正豐也

崔允儀墓誌

高一尺五寸七分廣三尺六寸一分四十七行行十九字正書

文肅公墓誌銘

公舊諱天祐改允儀字未知姓崔其先池城郡人也曾祖諱惟善中書令文和公是中書令文憲公之子口父子皆以功臣配饗清廟祖諱思濟中書侍郎平章事長平公考諱湧金歟光祿大夫守司空左僕射叅知政事柱國妣江陵郡大夫人金氏外祖諱上琦門下侍郎平章事文貞公亦以功臣配饗公為人剛明有大節少以才學知名舉口補入太學因從政出學戊申年以監

門衛錄事擢丙第越翌年拜大學博士遷右正言知制
誥自口出入省臺優游學士制誥之間備歷要途辛未
年遷御史大夫同知樞密院事癸酉年輸忠佐理功臣
禮部尙書判御史臺事兼太子大傅其年知門下省事
遷政堂文學累遷叅知政事修國史乙亥年中書侍郎
同中書門下平章事判尙書吏部事兼西京留守使丙
子年守大尉集賢殿大學士丁丑年門下侍郎同中書
門下平章事辛巳年判尙書吏禮部事監修國史 公
一掌成均再知貢舉每得其人又有知人之明判銓曹
首尾八年激濁揚清唯以稱職者爲用其於文章才學

之士尤加拔擢由是有識之人仰之若大山北斗 上
益加保重倚爲長城文虎百寮皆懷坐鎮之德畏如神
明 上欲輔東宮以 公爲大傅備禮 詔命口私第
公之輔導如漢四皓羽翼成矣其餘論道經綸左右
輔相之效爲不小矣 上之親愛敬重樂與之誠有加
而無已自古人臣貴寵之極未有其比可謂社稷元臣
矣忽今年仲夏月 公遇疾久不瘳 上之命有司祈
禱者不爲不至而羣寮百執以至軍卒皆許願祈壽奈
何皇天不佑享年六十有一此特可惜悲夫越壬午八
月二十有八日以疾薨于私第移殯于闕南佛恩寺菩

提院

上聞之不勝痛惜特下

批守大師門下侍

中上柱國樂浪郡開國侯餘並如故贈謚曰文肅公以
九月十有三日 命有司以禮葬于天和寺南山之麓
焉而後収骨越十月二十二日藏于松林縣地凝石寺
北崗 公娶金紫光祿大夫特進戶部尙書金義元之
女有子五人三女二男長女適試尙書戶部員外郎崔
仁二女適內侍閣門祇候金至當三女適內侍金吾衛
錄事李慤長男內侍左右衛錄事寬娶內侍試秘書少
監金闡之女二男將侍郎良醞丞同正謙未口其孫皆
幼壻口門祇候金至當請誌其墓試尙書吏部郎中口

國學直講知制誥金于蕃職□詞□□能宰辭謹爲之
銘曰

公之生世 騏驎鳳凰 蔚爲元臣 巍巍堂堂

致君高舜 濟俗成康 歷仕□朝 功業難量

唐之子儀 漢之霍光 嗟乎不幸 奄歸北邙

銘之萬一 以告無疆

允儀高麗史附崔沖傳後乃沖之立孫也誌稱曾
祖惟善祖思濟考湧沖傳則沖子惟善惟善子思
齊思齊子淪而不及湧又誤思齊爲思濟傳叙允
儀事實甚畧而毅宗世家則記其仕履頗詳有誌

所不及者允儀雖以口蔭致顯仕而史家稱其論
事明白慷慨典銓選注擬平允任用賢才又能文
章再掌貢舉時稱得人知此誌所稱揚固非漫然
諛墓之辭矣文中文虎百寮文虎即文武避武字
銘中致君高舜高舜即堯舜避堯字

金永錫墓誌

前石高一尺九寸七分廣三尺零五分二十九行行
二十五字後石高一尺九寸六分廣一尺三寸六分
十三行行二十
五字均正書

公諱永錫字□□州人也□□雄偉不常剛直尙儉
不妄動於利不詭隨於人獨於朋友故舊間篤信相好

出於至誠若有先逝者必爲之追飾歸路少疆學善屬
文其所著述皆出人意表軋統中以祖蔭初得良醞丞
同正丙申年除弓箭庫判官累遷大樂署丞權知春坊
通事舍人庚子春中丙第明年加詹事府注簿壬寅夏
仁宗即位以隨龍功拜閣門祗候尋改殿中內給事癸
卯春遷試尙衣奉御賜緋魚袋驟加刑部員外郎冬加
試禮部郎中出守清州牧及丙午歲會李氏事起以姻
親故降授兵部員外郎知制誥明年改戶部員外郎已
酉夏出知南原府事明年移守全州牧壬子冬召拜兵
部郎中乙卯夏兼充史館修撰官尋遷試大府少卿丙

辰秋兼御史雜端冬加衛尉少卿太子典內明年冬遷
秘書少監寶文閣待制明年秋兼知詹事府事是冬遷
試禮部侍郎明年改戶部侍郎庚申冬上表乞外除朝
散大夫秘書監知南京留守事翌年冬召拜試尚書右
丞皇統二年壬戌改試司口卿知兵部事三年冬遷衛
尉卿太子右庶子四年冬兼知三司事五年遷殿中監
是冬加試兵部尚書六年夏加朝議大夫冬即真八年
春兼善慶府詹事秋拜修文殿學士冬改吏部尚書九
年遷尚書右僕射三司使天德三年夏拜政堂文學判
禮部事四年冬拜中書侍郎平章事癸酉春知禮部貢

舉冬加判兵部事甲戌冬拜特進守大尉是年公年六十五以風痺乞退上初不許公堅乞不已上重違其意遂依允仍令致仕養疾于私第十有三年至丙戌四月八日薨享年七十八歲國家以厚禮葬之子輩依西域茶毗法收其骸考配饗功臣守大傅門下侍中判尙書吏刑部事監修國史上柱國兼判國學事仁存祖守大尉門下侍郎平章事判禮兵部事監修國史上柱國上琦曾祖尙書右僕射追封大師金陽妣慶源郡夫人李氏外祖守司空慶原郡開國伯上柱國李顥娶門下侍中李公壽之女生四男長早天次男軍器注簿直翰林

院門□□□□□□□□□□充史館修撰官兼太子
洗馬闡次左右衛□□□□□□□□□□□□□□□□
□□□□□□□□□□騰驤仕路公卒次內侍戶部侍郎□
□□□□□□□□□□□□□□□□長史閱女二人
長早沒次適閣門祇候裴晉公□□□□□□□□□□踐歷
清要四補外任三爲東路兵馬使一作北路元帥上合
宸衷下副民望所臨有聲一知貢舉所取皆名人嘗閱
大宋新羅醫書手撰竒要便於人者名之曰濟衆立効
方傳於世公生長閎閎而恢□□類出於稠人真博物
君子也其孤等移書於內侍大府少卿太子文學全居

實曰丁亥二月二十七日實窆于承天府清花寺山之
麓子其誌之遂執書以泣曰僕雖不肖幸爲通家口後
平生敬仰事之如父公亦視予猶子故與其子等親踰
骨肉公之平昔頗口詳口女未敢以辭語淺拙爲解淚
墨寫字乃作銘以哀之

銘曰

富貴不挾驕心

位踐台司

藏以斯銘

忠信兼修儉德

坐鎮王國

傳之罔極

此誌但稱公諱永錫無誌題不著其姓以文中考
仁存祖上琦考之知爲金永錫也仁存高麗史有

傳稱父上琦子永錫永胤永寬皆登第拜平章事
不記永錫事實而仁宗毅宗世家記永錫仕進除
拜多與誌合惟永錫之曾祖金陽不見於仁存傳
可據誌以補傳之闕耳仁存好學嘗與崔璿等刪
定陰陽地理諸書名海東祕錄又與朴昇中撰時
政策要又注貞觀政要永錫亦著濟衆立効方可
謂後先濟美者矣

李應璋墓誌

高一尺三寸九分廣二尺二寸五分三十二行行二
十六字二十五字不等前一行末一行皆無字正書
大金大定十七年丁酉四月二十四日大中大夫檢校

禮賓卿御史中丞知詹事府事隴右李公以疾卒于私第享年五十七越五月初七日火櫬于松林境內栢洞山麓移骨權安于梵福寺□□日其子份裝經袖公之行狀乞銘於翰林侍讀學士廉信若曰阿爺骸骨取七月二十四日葬于京城西福城寺南山之下宜有銘敢以誠告餘曰李公之□蓄宜銘而子又有禮敢不諾而銘諸粗叙所得以備暗訥公諱應璋慶原郡人也以門子筮仕備歷華顯甲子年入侍天庭爲中涓越丙寅年以卅卅尋□□戊寅年秋奉使汾海爲監稅使辛巳年補閣門祇候壬午年分道義州爲兵馬判官乙酉年

出使東藩□兵馬□□□是□出刺黃州牧壬辰年春
出按楊廣忠清州路是年加侍御史癸巳年出按春州
路□□□□□□□戶部郎中帶御史雜端俄轉御史
中丞兼太子右諭德丙申年加大中大夫知詹事府事
餘如故而終于是□吁可嗟也公外和寬內剛明容彩
閑雅性質端慤事君盡忠接士以禮有溫溫之德基無
訑訑之拒色自少常爲星宮二十許年主上信任不疑
甫佩郡符兩按州郡或奉使異國或掌兵兩□任職劇
官提綱臺□無不謹幹詳諦動多聲績朝臣無出其右
者金紫光祿大夫尙書右僕射叅知政事判戶部事貞

靖公軾皇考也尙書兵部郎中追封左僕射資孝王父也守大師門下侍中頹曾祖王父也配享功臣守大師中書令子淵高祖王父也安社保泰鎮守功臣守大師中書令口陽郡開國公李偉之女桂陽郡大夫人李氏皇妣也公之傳姓李氏長源遠派高門大族珪璋特秀賢俊濟美斯李氏所以綿千祀而甲百族也何其躋歛公娶守大師門下侍中崔溱之女大口口夫人崔氏生子二人曰份曰儂份官至衛尉注簿儂入流爲尙書戶部主事噫公之爲人也天與之才國與之位鎡基口貢火燿邦家秉鈞雅望屬公久矣奈何皇天不祐歟先朝

露中壽而天悲夫餘辱知有素亦有葭莩之意難拒份
儂之請但誌其萬一耳銘曰

惟公賢勞輒試牛刀志勵義高望重時豪巔華□□命
也難逃魂歸于蒿拔淚噀號既謝人世之塵囂安知直
捐□□□□詞泣血而霑毫勒銘藏在於巖壑

誌稱金紫光祿大夫尙書右僕射參知政事判戶
部事貞靖公軾皇考也尙書兵部郎中追封左僕
射資孝王父也守大師門下侍中題曾王父也配
享功臣守大師中書令子淵高祖王父也案高麗
史李子淵傳載子題孫資諒等而不及資孝與資

孝之子軾撰文之廉信若高麗史亦有傳官至政
堂文學禮部尙書傳稱一時高文大冊多出其手
而誌文殊庸甚何耶文中自稱曰餘借餘爲余也

李文著墓誌

高一尺九寸八分廣三尺四寸五分二十
八行行二十八字二十九字不等正書

高麗國金紫光祿大夫守司空特進尙書左僕射大子
少保致仕李公墓

將仕郎試尙書禮部員外郎賜緋魚袋張

公諱文著系出陝州曾太父成之追封禮賓少卿行試
戶部員外郎民善追封尙書左僕射行試殿中內

給事考沖門下侍郎平章事判戶部事歷仕 睿仁兩
朝以蹇諤稱母裴氏俠溪縣左司郎中寬□女公□而
□□以祖父蔭登名于吏籍仁廟代戊午年□授景寧
殿判官四轉爲樞密院堂後官毅廟天德四年出守洪
州先是此州屬縣諸□谷間盜賊蜂起爲害□甚公下
車飭戒軍校盡捕逐之境内之民安土樂業無外顧之
憂於□□渠引水溉田五六千頃以足民食倉廩實府
庫充合境歎息故□□申其□□ 上錄其名姓秩滿
拜監察御史正豐二年分司戶部員外郎中□□□□
□郎中兼三司判官乙酉出爲安西大都護府副使考

續入爲都官郎中□□□□少卿庚寅上嘉其忠
詔入□□仍轉吏部侍郎明年拜尙書左丞太子□□
越四年乙未六月拜衛尉□樞密院副使丙申加守司
空尙書右僕射明年丁酉四月二日有恙服餌于家是
歲十二月批銀青光祿大夫守司空如故越已亥以疾
引□乞退凡三上表不允是歲十二月上哀其老且疾
以金紫光祿大夫守司空□進尙書右僕射太子少保
許令致仕自是懸車養病越大金大定二□年庚子十
一月□十二日薨于家享年六十八即日移殯于神巖
寺十二月十二日葬于京城南進奉山之□麓公爲人

沉厚有大量自歷□□再守郡符皆有政績四爲廉察
便所至無不□□今上即位壬辰以□□□□使□
□□□□幸之能增重國本而庚癸之亂不見橫□以
保其身年除歲遷以至一品可謂事君貞而守身正者
也公娶尙書右丞金臣璉女生子六人長曰楊興德宮
錄事次曰挺東村場判官先公而卒次曰□□出家爲
慈興寺住持次曰杭內侍千牛衛錄事叅軍事次曰曇
機出家中大選加大師次曰珣良醞令同正女四人長
適少卿金彥誠之子緝光次適尙書魯敏功之子廷幹
皆先亡其次二女皆迷年矣銘曰

氣嚴而重 哲人之常 愛人盡已 乃吏之良 遭時多難 周

德温而諒 始登樞右 疾入膏肓嗚呼哀哉

尹宗諒墓誌

高一尺六寸一分廣二尺零九分二十三行行二十十字正書

公姓尹諱宗諒推忠靖難功臣□中文定公第六子也
天資明辨□□□毫無所淹滯幼承庭□□□于學年
纔十七才司馬試便遊大學足年於金□國門下登第
歲至庚寅今 上始踐寶位以公為勲門子弟即除校
書郎累遷禮賓丞 西都跋隴 上命文定公杖鉞往
征拜公監察御史□□之俄自戶部員外郎知制誥轉

秘書丞已歿出守廣州女女口戴星出入固無怠色光口
摘發姦口口民皆口口口口刑部郎中更口口口皆帶
口口口口東宮侍讀事前後凡三出爲廉口使皆有威
譽轉衛尉少卿口授刑部侍郎知禮部事依前知制誥
越戊申口月十四日口口討廳事中暴風忽不得語食
頃口殞春秋四十六公雖起自勲閥口弟二人皆以文
章口口朝欽艷而口口登大位相次早天時大夫人尙
在堂朝野莫不口口公祖中書侍郎平章事諱彥頤口
口口口侍口諱口本鈴平縣口外祖口口侍郎平章事
諱惟忠姓韓口皆金口相繼在口東号稱著姓公娶口

部郎中金□之女卒無子亦□□□以是月二十五日
葬于松□縣□□山之麓禮也

銘曰

其時可 于嗟不壽 有水□□ 刻石在廟
其器奇絕 桂死蘭衰 □山峨峨 万世不磨

時大金大定二十八年五月 誌

宗諤爲海東勲臣之後曾祖瓘祖彥頤父鱗瞻高
麗均有傳此誌稱宗諤爲鱗瞻弟六子而鱗瞻傳
但載四子而宗諤爲季傳又稱鱗瞻贈推忠靖亂
匡國功臣而誌作靖難未知其孰是也

白任至墓誌

高一尺五寸四分廣二尺六寸七分二十三行
行二十一字二十字不等末一行無字正書

公諱任至姓白氏大興郡人識量宏遠旅力過人嘗寓
於外祖鄉藍浦縣挾跡入京師始以善射六鈞之弓著
籍山西翔泳羽林累蒙 聿權使預祿秩歲在庚寅以
侍從之功加奉職八品兼簽錄立德宮連連見陟不數
年間參入帶犀之列趙爲罷之舉兵也公將□□千人
屏翰中堅自京城西郊之戰及彼連州與西都之役績
効尤多增秩爲右軍知兵馬事是年政即拜大將軍平
定之賊復 命之後受 批爲知刑部事賜紫金魚袋

若夫出杖錢於北方則邊陲以靜主祀事於平壤則山川亦寧凡厥所莅無不允諧果符器重 授以上將軍之職俄而爲刑部尙書或遷於兵部尙書充東宮侍衛主張班聯越在戊申進爲樞密院副使工部尙書尋傳爲知樞密院事吏部尙書大子賓客庚戌年爲知門下省事工部尙書年六十一忽寢疾辛亥二月二十二日卒 遣使追悼贈謚爲景烈公取三月十二日備禮儀葬于此地銘曰

江南秀氣

命世而生

挺身崛起

戾止于京

優游禁署

荷寵飛榮

官兼文虎

所臨有聲

望重朝聯 位居宰輔 謂拍百羊 永爲國柱

何壽不長 忽歸於土 貞石記辭 以示萬古

任至高麗史有傳初以驍勇立功卒至台輔據誌
歷任刑工吏三部尙書傳但書拜刑部尙書任至
卒後贈諡景烈史亦不及

僧智偁墓誌

高一尺五寸六分廣二尺四寸八分二十四行
行十七至二十五字不等末二行無字正書

靈通寺住持通炤僧口智偁字致原南原人也俗姓尹
氏其祖父皆郡吏師幼而好浮圖道落髮爲僧謁洪圓
寺住持僧統教雄師事之比年二十七戊午歲一中宗

選越口申歲首住灯口口寺之南有巨海漁人罩網日
夜雜遯師始住之三年甲戌春身自口口至今漁人傳
以為故口不復近寺矣庚寅歲除三重乙未歲受 賜
滿內袈裝已亥歲加首座庚子歲受 賜滿口口丁未
歲加僧統己酉口典領中選庚口歲受 賜滿繡袈裝
是口口月會 國家設百座會以師為空門口口俾典
之辛亥歲於 內殿大藏道場亦為之首口口口領成
福選壬子歲四月又掌宗選夏月始有口口之志乃下
捫三角山圓覺社口是後無所口口所為如在正定澹
如也是年十一月以年八十上章乞退十二月戊申終

于圓口社葬用辛酉焚身至明昌四年癸丑歲二月二十三日移葬遺骨於進奉山南麓門弟一百餘人恐師之懿德湮沒而無聞略記端倪并附于墓其詞曰

師之德正以直 寬有容得未得 師之教攝衆妙

惟後進所則効 師之壽老且耆 年八十入燕

有 厥徒衆哀呼號 藝茲石附于墓 億萬年長

不竅

明昌四年二月二十三日 志

李勝章墓誌

高一尺七寸七分廣三尺五寸三十三
行行二十三至二十四字不等正書

公姓李氏諱勝章字質夫尙州京山府人父棟民少與計偕北學于京才學與椿齡知常齊名擢乙第官至權知監察御史公幼孤及志學義父以家貧不欲它方學將與其子同業其母執不可曰妾以衣食故見愧栢舟然其遺腹幸今成童志于學必宜投屬亦父卒徒俾踵後塵若不尔則吾何面復見先夫於地下遂勇斷其志乃以公歛學率性齋蓋從口夫舊業也公學聚問辨才調曰新嶄然見頭角士林皆謂李氏有子洎戊子春從試大司成金公敦中門下擢第二人進士金公雖喜隸門生猶不以魁舉為恨及是年秋公才出身及第然後

喜見顏間曰吾舉得人可見於此壬辰出補管城縣尉
政簡刑清民以爲更及癸巳擾攘列郡皆殲令長以償
宿寃公獨口愛爲下民推載獲免斯厄挈家避居本邑
沉浮里閭專以經史自娛適甲午年大慙伏誅公於戊
戌春上洛求仕擢直史館累遷興威衛錄事叅軍權兼
直翰林會癸卯冬起居郎崔孝著告奏金國公以書狀
官從之一行專對延譽上國皆公之力以功轉大官丞
兼同文院錄事俄遷四門大學博士累轉詹事府司直
凡士之求仕者苟或禁林國學得署一官則無不口耀
終身爲榮公始自蓬山玉堂揚歷大學不數年間遷累

東朝寮佐昵迓 儲威則官宦之榮莫公若也至辛亥
冬擢授權口監察御史春三月即拜真焉是年二月十
三日寢疾風痺越九月朔示終于私第享年五十五噫
父子皆終于是職時人莫不嗟異之以是月十五日依
內教茶毗于白口寺之東麓拾遺骸越翌年癸丑四月
二十四日歸葬佛日山之北麓公爲人公忠寬毅纖介
不掛懷奉庭闈孝謹交朋友信義許國効官自任以文
翰忠義將大有爲於人間世何天不弔見天中壽悲夫
公通司儀署令趙公之女生子男六人男四女二長松
茂擢進士第歟中書舍人知制誥口公之女仲百口

擢丙第。中軍兵馬錄事。良醞署令。吳公之女。今俱顯。
仁口口閣。讎校其餘。子女尙幼。平少與公同學。辱知最
厚。况松茂等來告曰：先公之執，莫如子而或兼筆削。宜
銘其所可銘，乃爲之銘曰：

公之懷忠以衛，大有爲。公之才清而婉，少葳蕤。
厚其德薄其祿，將何其。以餘慶其有後，宜無疑。

時明昌四年癸丑四月 日友人起居郎知

制誥金平誌

柳公權墓誌

高一尺五寸三分，廣二尺七寸三分，四十二行。
行二十五字，二十七字不等，末空二行，正書。

政堂文學叅知政事判尙書禮部事柳墓誌

公諱公權字正平姓柳氏始寧人也曾祖諱盧一檢校
大將軍行散貲祖諱寶春檢校少府少監考諱寵檢校
少府少監妣曰雙口縣大君李氏公自少好讀書不事
它技發爲文章明白純口口口也貞元三年中成均試
明年入大學季考月書每登優等至庚口相國金公永
夫門下乙科登第辛巳以例出掌清州牧書記洗口奉
職吏民皆不忍欺既三年入爲翼陽府錄事其進退動
有恒常上以此知公忠正無他蹇蹇有大臣之節風
雲之會實基於此焉至於庚寅今上踐祚思欲大用

即召公爲內窶仍授四門博士兼直史館遂口軍器大
府注簿乙未拜閣門祗候自是以後年除歲遷歷拜殿
中內給事尙衣奉御戶部貢外郎工兵兩部郎中壬寅
兼國學直誦諸生皆有矜式所謂學行可師者也明年
加將作少監大子司經又轉爲太子中允充史館修撰
官又明年加軍器監東宮侍誦學士公有鄭覃替古守
正之德故太子每見特加禮遇丙午奉使北朝周旋中
矩禮無違者北人因敬焉 上嘉其不辱君命改授吏
部侍郎仍拜禮賓卿樞密院右副承宣公自庚寅遭遇
以來不離天院備歷高華以至喉舌之任 上之待遇

親若腹心。夔越它臣。乙酉掌南省試。所得皆一時名士。學者以爲羨談。明年加判大府事。右承宣。又明年加國子監大司成。兼太子贊善大夫。王子加翰林學士。同知貢舉。先是場屋間諸生例皆相覽潛竊。至於賢愚混淆。公知其如是。及闢禮闈。一行規法。試席肅正。榜下悉皆英俊。時人謂之桃李在門。明年轉爲左散騎常侍。知奏事。知吏部事。公爲納言。七年之間。對顧問則內無隱情。當獻替則動有直氣。朝綱國体多有補益。雖仲山甫出。納王命無以加也。甲寅拜同知樞密院事。兼太子賓客。至於明年。忽嬰風疾。療之不即愈。以爲知足不辱。知止

不殆古之道也况疾之漸乎遂上章求免厥職 上詔
云古典曰曷任舊人共政人惟求舊寡人豈遽從之乃
堅執累不允更乞懇款又 詔曰寡人思與舊共政今
卿若此如失伴之鳥然卿幸年未老延年則更置公卿
之列寡人所製願得延年唯請是從公於是專以藥石
爲養忽一日喟然曰人羨久生將以爲安佚今疾若茲
不如化之愈也其默默游心虛淡雖親戚有不能識者
病且革 上乃下詔拜爲政堂文學叅知政事判礼部
事越丙辰秋七月十九日卒于私第享年六十五噫奔
驥騁力中途踈足高鴻輕舉在雲墜翼凡士大夫無不

哀慟 上亦聞之惻然賜謚曰文簡公即以其年八月
十三日庚申葬于松林郡西山南麓夫人大府注簿孫
珏之女封懷道郡君生子男二人女子一人長男今爲
入內侍試戶部郎中兼太子內直郎次男今爲內侍精
勇攝別將女適天水子今爲工部郎中知制誥其銘曰
有文章足以貫道有事業足以濟時位登宰輔德爲元
龜天子念舊後有褒嘉公於人道其又何加一代之宗
万夫之望泰山其頽人將安仰百世之後松栢蒼蒼是
惟公之墓無或毀傷

公權高麗史有傳與誌所載事實均合惟詳畧異

耳公權以儒臣致位通顯史稱其性公廉居官不
懈晚年以病乞休却藥不飲與誌所載亦合蓋當
時權奸在位李崔繼起國事日非故有祈死之志
即是觀之可想見其爲人固非僅以文學稱美已
也

補遺卷四